



*Inuussutissarsiornermut, Aatsitassanut, Nukissiutinut, Inatsisit
Atuutsinneqarnerannut Naligiissitaanermullu Naalakkersuisoq, Naaja H.
Nathanielsen.
Nuuk Pride, 28. juni 2025.*

Ataatsimoorluta nukittunerpaajusarpugut

Assigiinngiaassuseq asanninnerlu pillugit iliuuserpassuasi pillugit Sipineq+ aamma maanga takkussimasusi qutsavigiumavassi. Suliarisassinnut pingaaruteqartumut aamma sapiissuseqarneri ersersitarsi pillugit Sipineq+ qujanaq.

Ukioq manna Pride-ip ingerlanneqartarnerata sooq pingaaruteqarnera pillugu oqaasertaliinissara pisariaqartippara.

Isumaliortoqarpat Pride tassaasoq ileqqut isoriniarnissaannut inuit ilaasa nalliuttorsiuutiginninniaannarnerannut taamaallaat pissutaasoq, imaluunniit ingerlatsiviup, tunisassiaminik amerlanerulaartunik tunisiniannarluni neriusaap erfalasuanik nittartakkaminut ikkussinerusoq, taava kukkusumik isumaliortoqarpoq.

Pride NALLIUTTORSIORNERUVOQ. Kisianni nalliuttorsiorneruvoq ilungersunartorujussuarnik imaqartoq. Tassami tunngaviusumik sinniisuutitaqarneq aamma pisinnaatitaaffeqarneq pineqarput. Imminut pilluni isertuannnginnissaq imaluunniit imminut kanngusuutiginnnginnissaq pineqarput. Tamat inissisimaffiini inissamik piumasaqaateqarneq pineqarpoq.

Pride sooq taama pingaaruteqartiginersoq pillugu uagutsinnut oqaluttuarnut oqaaseqaatinik marlunnik atuaassaanga. Oqaatsit sakkortummata siuningaani mianersoqqussutigissavara. Oqaaseqaatit taakku marluk Naalakkersuisut Pride pillugu qaammateqartitsinermut tapersersuinertik pillugu nalunaaruteqarnerannut aamma Naalakkersuisut nittartakkaminni Facebook-imilu neriusaap qalipaataanik ikkussinerannut atatillugu oqaaseqaatigineqarput.

“Amerikami suiaqatiminoortartunit suut tullertut issuassavagut? Meeqquerivinni atisaajarlutik qitittassappat? Angutit, imminnut arnatut isigisut misigissusaasa ajualletsinneqannginnissaat pissutigalugu amerikami arnat niviarsiaqqallu atisalersortarfinni pinngitsaalillugit atoqatigineqartartut issuassavagut? Amerikami satanistit neriusaamik atuinermi pissusaat nunatta ilinniutigissavaa?

“Kanngunarluinnartumik nuanniik aamma guutip satanistit sernigiligit....meeqqat ulluanni, inunnut akuerisaanngitsunut ulloq taamaallaat pineqarpoq.”

Oqaaseqaatit taamaattut Pride-ip pingaaruteqarsusianut pissutaapput. Suiaassuseq pillugu aamma suiaassuseq kajungiffigisaq pillugu ilisimasat pilersinneqarnissaat aamma isummat pigiliutiinnakkat akiorneqarnissaat suli pinasuartumik pisariaqartinneqarput. Aamma inuiaqatigiinni asanninnerup isumassuinerullu siamarsarneqarnissaa suli pinasuartumik pisariaqartinneqarput, taamaalilluni kikkugaluartut eqqarsartariaaseq imaluunniit asanneriaaseq pillugu inoqatiminnut saassussinissaq pisariaqartissanngimmassuk. Maani kikkut tamarmik naammattumik inissaqarput.

Inuit LGBT+-iusut amerlasuut suli isummanik pigiliutiinnakkanik, immikkoortinneqarnermik aamma qinngarsuisumik oqaluunneqarnermik misigitinneqartartut, Inuit Pisinnaatitaaffii pillugit Siunnersuisut misissuinermi takutissimavaat.

Aamma suli taamatut pisoqartartillugu, ataatsimoornissaq immikkullu iliuuseqarnissaq pisariaqartinneqarpoq. Allatut ittuusinnaanerup ileqquunerata takutinneqarneratigut.

Inuiaqatigiinnik, assigeeqqissaamik eqqarsartartunik iliuuseqartartunillu takutinnga, taava inuiaqatigiit taakku kiffaanngissuseqanngitsuummata neriorsussavakkit.

Naligiinneq naligiissitaanerlu pillugit akiuunneq suli ajugaaffigineqanngilaq. Kisianni suli tamanna aamma ajorsarfiginngilarput. Nunarsuatsinni sumiluunniit soraajuitsumik siuariartortoqarpoq. Ajoraluartumillu aamma illuatungaani pisoqartoq takusarparput.

Ajoraluartumik ulluni allanngorneqalerfinni inuuvugut, nunanilu arlalinni inuit pisinnaatitaaffimmik killilersorneqarnerat, aamma kinaassusertik pillugu aalajangiisinnaassutsimut kiffaanngissuseqarnermik annikillisinneqarnerat misigisarpaat. Periaatsit taamaattut ilaaffigissanngilagut.

Allatut ittuusinnaanermut pisinnaatitaaffik pillugu ullumikkut ataatsimoorpugut. Kimulluunniit asanninnissamut pisinnaatitaaffeqarpugut. Qanoq ikkaluartumik isikkoqarnissatsinnik pisinnaatitaaffeqarpugut. Nammineersinnaatitaanermut namminerlu inuuneqarnissamut pisinnaatitaaffeqarpugut

Aamma uagut sioqqulluta suliniuteqarsimasut suliarisimasaat iluaqutigaagut. Taakkumi siulliullutik akiuussimapput. Taakku pisuullutik suaqatinik atoqateqartarneq nappaatitut isigineqarunnaarpoq. Taakku pisuullutik suaqatinik atoqateqartarneq pinerluttuliornerunnaarpoq. Akiuunnerit taakku akiuuffigisimasaat pillugit allatuiffik takisoorujussuuvoq aamma suut annaaneqarsinnaanerata pillugu oqaluttuurlutik.

Naleqartitagut suunersut nunarsuarmioqatitsinnut ullumikkut ersersipparput. Ersersitsineq taanna aatsaavissuaq siullerpaamik Naalakkersuisut erfalasulerfianni aamma erfalavoq.

Sanilivit assaa tiguuk, talisi qummut siaarsigit, maanilu kikkut tamarmik
inissaqarmata nunarsuarmut takutissiuk. Ataatsimoorluta
nukittunerpaajusarpugut.

Asanninneq ajugaali!